



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Zelenskyy-i EU lenirtem dang tekumdangtsü ashi

Carlos Alcaraz aser coach Juan Carlos Ferrero na pilaogo :

VOL. XXIII ISSUE NO. 73 (ADOK 73) DIMAPUR ROGONÜ (FRIDAY) LUCHII (DECEMBER) 19, 2025

₹ 5.00

Aoyimkümyimten aser Lanur Telongjemi aitsür

Dimapur, December 18 (TYO) : December 15, 2025 aonung ayaterem nung NSCN-K (Khango-Vusshe) teloki Aoyimkümyimtak injang mashimashi khatoka amokmerener nisung pungo tashi pua bener aoba mapa anema Aoyimkümyimteni kanga sashia aitsür ta parnok yimten sangdong ka ajanga metetdaksüogo.

Iba ama kecha tarendak makai ozüing raksaba mapa inyakba ya yimtsüing nung tensa mapang tajung raksatsüba mapa ka lir, iba yabo tai madoktsü, kechiyong iba ama mapa yagi Aoyimkümyim nung alirtem ajak mezüingmeshiogo ta parnok metetdaksü.

Iba ama lendong ataloker külen mapang meindoki yakta dang khuret agizüka inyakba asoshi Dimapur Ao lanur

Telongjem aser lokti tentettem ajak dang pelar ta Aoyimkümyimteni metetdaksü.

Iba ama tashiyim amshia ozüing raksaba mapa inyakertemji yakta dang pua tapet temerenshi agütsüsüla ta Aoyimkümyimteni government nem metetdaksüogo.

Kasa lendong atalokba mapatem anema Aoyimkümyim Lanur Telongjemi kanga sashia aitsüba sangdong ka nung metetdaksüogo.

Iba ama yim telongi aita ozüing raksaba mapa inyakba yabo tagizüktetsüla ken o aser mapa masü, ibai tasümaim mapa, anungji ozüing aser bangdak amertemi yakta dang aibelener bushia tapet temerenshi agütsüsüla ta Aoyimkümyim Lanur Telongjemisa metetdaksü.

Gramin Dak Sevaks atema oshi 19 agizükogo

Dimapur, Luchii/December 18 (TYO): Department of Posts, Ministry of Communication, Government of India kübok Gramin Dak Sevaks (GDs) shimtsü atema state nung oshi 19 shimba osang Nagaland sorkari sangdongogo.

Home Department ajanga December 16, 2025 nü sangdong ka agütsüba nung, 'local languages' shimba ya Department of Posts ajanga GDS applicants tem 'language proficiency' kulizüing agütsüsü

atema lir ta ashi.

Item oshi ya Angami, Ao, Chang, Chakhesang, Konyak, Khiamniungan, Lotha, Phom, Pochury, Rengma, Sumi, Sangtam, Tikhir, Yimkhiung, Zeliang, Garo, Mikir, Kuki aser Kachari alitsü.

Item oshi nung proficiency certificate ya district shia Deputy Commissioner ajanga agütsüsü.

Iba sangdong ya Nagaland Gazette nung adokba anogo nungi mapa kuma inyaksü, ta sangdong ajanga ashi.

Tir Yimyim nung inyakertemi mang ayimer



Wt. S. Aienla

Dimapur, December 18 (TYO) : Tir Yimyim nung Mokokchung nungi osangbener Wb. Aso Imsong kinungtsü tajung Wt.S.Aienla ajungbena ka dang December 18, 2025 anepdang iba lima nungi piladokba atema Tir Yimyim nung külem inyakertem ajaki kanga jashia mang ayimer ta sangdong ka nung Tir Yimyim yimozüluri metetdaksüogo.

Asür S.Aienla ya anepalu aketba tetsü aser kinungbo asoshi teyarir tajung ka dang masü saka Tsüingrem tenzükba mapa nunga bendanga agüja inyakba tenzükba ka liasü. La ya Chuchuyimpang Baptist Arogo nung Christian Education Ministry nung sannüker liasü.

“La asüba ajanga lar kibong asoshi temeim tetsü aser teyarir kinungtsü ka samar, arogo nung

tanur aser lanurtem asoshi lenir aser sannüker tajung ka samar aser onok asoshia tashi aser teyarir angudak lenir tajung ka samar asütsü, la mapa tajung mamadoktetsü aser la ama lenir tajung angutsü tasak asütsü,” ta Tir Yimyim sangdong nungsa metetdaksü.

“ Iba ama mangyim jashi mapang nunga, Tsüingremi kinungbo nem pa kinungtsü tesüsaba anogo aser mapang tashi pa teka agi kongshia anepalutsü mapang tajung agütsüba meteta onok mulung anisüngzüker aser la kecha mekangshii ayongayonga dang tesünap nung pilaba jagi la teti tepela nung anisüngzüdak tajungdaki ogo ta jangjar,” ta kasa sangdong nungsa Tir Yimyim yimozüluri metetdaksü.

Iba ama mangyim jashi mapang koktetsüsä, Taochiba Tsüingremi külem inyaker aser kinungertem ajak nem tashi tasen aser tesünap agüjangma ta sarasademtsür ta kasa sangdong nung Tir Yimyim nung inyakertemisa lemsatep.

Mokokchung Press Club-ia külem medemer aser züingsem Aso Imsong temeim kinungtsü Wt.S.Aienla alima nungi ajungbena dang pilaba osang angashia mangyim jashi lemsatepba osang ka metetdaksüogo.

MGNREGA magieni tali ang tashi itshitsüla. NPCC



NPCC-i MGNREGA agientsü atema Bill benoka aliba anema longkak aitba sentong nung tangokba noksa angur. (Kohima Dec 18, 2025)

Dimapur, Luchii/December 18 (TYO): Mahatma Gandhi National Rural Employment Guarantee Act (MGNREGA) agientsü atema Bill benoka aliba anema longkak aitba sentong ka Nagaland Pradesh Congress Committee (NPCC) aser District Congress Committee (DCC) Kohima den Nagaland nung tanüingba DCCs ajanga December 18, 2025 nü Kohima nung ayongzüka liasü, ta NPCC Communication Department sangdong ka nung ashi.

Yimdak-yimtsüing nung aliba nüburtem MGNREGA nung metaloka lir. Iba yagi aayangtsü agütsür, kibong tem yarir aser nüburtem yimya shidak nung aayangba nung yarir. Nagaland

asir India tesem balala nung aliba yimtsüing aika nung iba Act ya timtem mapang source of income tongtipangtiba amai lir, ta ashi.

Longkak aitba mapang lenirtem aser party workers temi ashiba agi, MGNREGA agienba ajanga aluyimer, anogoshi aayanger, tetsür aser lokti nung tesensaktiba nüburtem timtemtsü. Iba yagi unemployment tali akumtsü aser kibong aika tali timtemdaksütsü.

Alimar lendong timtem, rongsenketzüing mapetmesü aser ajungben rongdak mapang MGNREGA yagi nüburtem yaria liasü ta iba sentong nung o jembirtemi ashi. Iba Act agienba ya India yimtsüingtemi

nüngdakba tsütsü tesülen shitsüba amai asütsü0, ta NPCC lenirtemi ashi.

NPCC aser Kohima DCC ajanga sorkar dang iba Bill agientsü aser MGNREGA wazüka ayutsü khangha liasü.

Parnoki iba scheme tembangtsü melen tashi itshia senotsü timi mapang shidak nung agütsüsü ayongzüik.

Terenlok ajanga maka-maiter tem senzuka medoktsü yarisüla. Yimdak-yimtsüing nung aliba nüburtem temeden wazüka ayutsü atema Congress party akang-akanga nokdaka lir. Yimtsüing nungi ola adokba ya tongtipang aser ochi asoshi maneni raratsü, ta sangdong ajanga ashi.

State nung AMRIT Pharmacy amenoktsü

Dimapur, Luchii/December 18 (TYO): State nung AMRIT (Affordable Medicine and Reliable Implants for Treatment) Pharmacy tenzüktsü atema Directorate of Health & Family Welfare ajanga Ministry of Health & Family Welfare, Govt. of India kübok Public Sector Undertaking, HLL Lifecare Limited den Memorandum of Understanding (MoU) ka December 17, 2025 nü zülutepogo.

AMRIT Pharmacy ya HLL Lifecare Ltd ajanga tenzükba mapa tajung ka lir, kobai cancer,

cardiovascular aser danga tashidak tem anepalutsü asoshi medical items (mozü tabu ajak, surgical items, consumables and implants) jenjang talangba agi agütsüsü aser tashidak tabu ajak anepaluba jenjang ajemtsütsü aser India nunger ajunga jenjang talangba agi temang anepalutsü nükjidong lir.

HLL Lifecare Ltd yagi Chümoukedima nung aliba State Family Welfare Training Institute nung warehouse amenoktsü aser iba nungi public hospital balala indang Citizen Welfare Pharmacy

ajanga nüngdakba oset alizüktsü.

Maneni HLL Lifecare Ltd yagi nüngdakba public hospitals nung "Amrit Pharmacy" outlets lapoktsü. Iba ya ajanga State nung nüburtemi jenjang ajemer mozü tajung angutsü, aser iba yongji treatment agiba nung senotsü tajemba indoktsü.

Iba MoU nungya Department tenüing nung Dr. Mereninla Senlem, Principal Director aser HLL Lifecare Ltd tenüing nung Dilip Kumar Mishra, Senior Manager (RBD-North East) ajanga meyongnem agütsü.

Nagaland nung PMS atema sen 62 crore agütsüogo

Dimapur, Luchii/December 18 (TYO): Post-Matric Scholarship for ST Students scheme kübok FY 2024-25 mapang atema Nagaland nung kaketshir 41,793 ajangzükttsü asoshi Ministry of Tribal Affairs ajanga sen 62 crore agütsüogo, ta Minister of State for Tribal Affairs Durgadas Ukey-i Brehostibarnü Lok Sabha nung tezüluba nung telangzüba agütsü.

Tesüiba financial years pongu mapang, Union sorkari Nagaland nung 2020-21 nung kaketshir 36,940 atema sen 32.26 crore, 2021-22 nung kaketshir 40,588 atema sen

44.36 crore, 2022-23 nung kaketshir 42,485 atema sen 36.08 crore, 2023-24 nung kaketshir 42,485 atema sen 35 crore aser 2024-25 nung kaketshir 41,793 atema sen 62 crore agütsüba data nung sayur.

North-eastern states tem atema data nung sayuba agi Post-Matric Scholarship for ST students scheme kübok Union sorkari Arunachal Pradesh nung kaketshir 45,125 atema sen 100 crore, Assam nung kaketshir 77,350 atema sen 79.71 crore, Manipur nung kaketshir 32,275 atema sen 25 crore, Meghalaya nung kaketshir 73,902 atema

sen 145 crore, Sikkim nung kaketshir 2,411 atema sen 6 crore aser Tripura nung kaketshir 33,506 atema sen 74.94 crore agütsü.

Pre-Matric Scholarship scheme dak sendakba nung taoba mapang agütsüba mamshi anünga aliba mesüra utilisation certificates (UCs), statements of expenditure (SoEs), formal proposals aser danga nüngdakba documents tem magütsüba ajanga senotsü magütsüba states tem rongnung Nagaland dena lir.

Iba scheme kübok central sorkari 2021-22 nungi Nagaland nem senotsü kecha agüja mali.

12buba PYO sobaliba sentong agiogo



Kohima, Luchii/December 18 (TYO): 12buba Porbami Youth Organisation (PYO) sobaliba sentong December 17 nü "My Culture, My Identity" omen nung ajemdaker agiogo.

Iba sentong ya Basapu Zo Sporting Club-i ayongzüka Phek District kübok BZSC Recreational Ground, Porba nung agia liasü.

Sentong nung tongti o jembir ama o jembiba mapang Joint Secretary, Minority Affairs to the Government of Nagaland Neingulie Krome-i, tongti o jembir ama shilem agitsü atema maongka agütsüba asoshi Porbami Youth Organisation aser Porba yimtsüng nungi sobaliba teloktem dang kanga pelaba lemsatep.

Paisa, tetsü tebou mapang telongjem maneni akangshitsü nüngdaker, ta ashi.

Pai, pa nem tetushi agütsüba ya pa dak alangba agi masü saka par yimtsüng Zelome aser Porba na tesendaktep tajung aliba ajanga lir ta ashi.

Omen "My Culture, My Identity" dak ajemdaker jembiba mapang pai, sentong yanglurtemi onük tapet ka shimogo, kechiyong tanü lanurtem pei sobaliba aser

maitsü nungi pila aoba mapang ka lir ta ashi.

Pai, sobaliba ya aseni jembiba oshi, tamangba aser asen libaliro dak sendaka lir ta ashi.

Tetsü tebou mapang lenmang, radio mesüra TV mesüra Telephone mesüra mobile phones aser gari maliasü aser communication aser technology khenyongi maliasü, saka ochishiba, nendak nendaka inyakba, bendanga agüja meranga inyakba yimya parnok dak keta liasü, koba tanü putu nung nüburtem dak anünga lir, ta Krome-i ashi.

Paisa, sobaliba maneni wazüka yua lanurtem nem belenzüka agütsüba asoshi yimtsüng nung yimputem dang kanga pelaba lemsatep.

Krome-i lanurtem dang, bendanger sobaliba angazüka beshitsü melena item yimya tajungtem ya beshitsü ajungshi, koba ajanga sobaliba taküm toktsür.

"Asen tetsü oshi ajanga na aser ni shiba aji jangjar," ta Krome-i ashi. Bendanger oshi aika shia liaka pei tetsü oshi memetetra asen maitsü samatsü, ta pai shisem.

Pai, Latin Americas, South

Indian Tamils aser asen kidanger Manipur nungertemi pei oshi kanga tongtibasa jembiba indang tatishitsü bener arua jembiba.

Tanü asüng lanurtem social media agi kanga atsüer aoer aser lanurtemi western culture, Korean aser Japanese sobaliba sülen anidaktsü meranger ta shia Krome-i, "item sobaliba sülen anidaktsü melena asenoki asen sobaliba otsü, tsüsang aser kentem ajungkettsü merangtsüla," ta ashi.

Sentong nungsa tetushi tejaoker Porba Village Council chairman Ciekrohü Chiero-i, sobaliba aser maitsü wazüka ayutsü koda tongtibang iba indang jembiba liasü.

Mangko bushitepba mapang yimtsüngtem tsüngda koda temba yimtep aser timtem mapang parnok koda kati ka den yaritep iba indang pai jembiba liasü.

Sentong nung sobaliba tsüsang, arr atsütepba, meyua ola agütsütepba, sobaliba ken amala tetoktepba agia liasü.

Sentong ya PYO Finance Secretary Kuthovo Vadeo lenisüba nung agi aser PYO tir Vecuru Dzudo-i lokti pela agizükba o jembiba liasü.

Mokokchung Press Club-i asükhu lemsatep

Dimapur, Luchii/December 18 (TYO): Mokokchung Press Club-i sangdong ka ajanga külem züngsem aser Tir Yim Yim osangbener tejen Aso Imsong kinungsü S. Aienla ajungbena asüba osang angazüka khu khua mang ayimba lemsatepogo.

Asür S. Aienla-i Chuchuyimpang Baptist Church nung Child Education Director ka ama kanga bendanga agüja tenzükogo, aser la taküm ajanga tanur taküm aika dak kongshiogo. Lai bendanga agüja inyakba, la aria bilemba mulung

sentsü aser la tashi ya teti tenüngsanga bilemettsü.

Lai temeim kinungbo, jabaso ka aser jala ka toktsürogo. Mokokchung nung press fraternity tenüng nung onoki Aso Imsong, par chirnur aser kinungertem asükhu lemsateper. Tulusang Tsüngremi mangyim jashi tia nung aliba mapang parnok nem anisüngzüik, tashi aser yimjung agüja ta aser la tanüla teti tatem makadak anisüngzükdakjang ta sarasademja atar, ta Mokokchung Press Club sangdong ajangsa metetdaksü.

Life Foundation School küm 25 ajungba benjung mungogo



MLA & Advisor of Civil Administration Works Division and Taxes Kudecho Khamo-i, Chairman Rev. Dr. Vezopa Tetseo, aser LFS Headmaster Nuphizo Tetseo na den Silver Jubilee Souvenir sayaba noksa nung angur.

Chumoukedima, Luchii/December 18 (TYO): Life Foundation School (LFS) lapoker küm 25 ajungba benjungmung December 13 nü mungogo. Iba sentong nung MLA & Advisor of Civil Administration Works Division and Taxes Kudecho Khamo tongti o jembir liasü.

Sentong nung kaketshirtem aser sentepa aliba lokti den o jembiba mapang Khamo-i, kaketshirtem dang temaba jenjang tongtettsü atema meranga inyaktsü ajungshiba den lanurtem tetoktepba lima ka nung alir asünung atsüngzüka maotsü kümdangtsü ajungshi. Paisa, meranga inayktsüba dak alaker tanga lenmang mali ta ashi.

Jubilee küm school nung class IX aser X bendenlokba

atema pai School Administration nem tenüngsang agütsüba den iba ya alizüng tasen ka tongtetba lir ta ashi. Khamo-i, kaketshirtem anitettsü atema takok tashi meranga inyaktsü atema tesayur aser school achaaYangertem ajungshia liasü.

Iba sentong ya Ravolu Lohe lenisüba nung agi aser Pastor Chakhesang Baptist Church Chumoukedima Village-i Tsüngrem temaotsü meshizüka sarasademba sülen school naklo ken "HOPE" Hitoka-i anir kaketshirtemi choir-i tena liasü. Sentong nungsa Jano Nyekha-i ken tajung ka tena liasü.

Maneni sentong nung Headmaster Nuphizo Tetseo-i tepela o jembiba aser Life Foundation School indang taoba Headmistress Arhoni Krose-i sarasademmer tembanga liasü.

AR-i ayongzüka Ex-Servicemen Silver Jubilee mungogo

Dimapur, Luchii/December 18 (TYO): Assam Rifles-i ayongzüka Mokokchung nung Ex-Servicemen Silver Jubilee mungogo. Ex-Servicemen temi linük asoshi parnok taküm bendanga agütsüba atema parnok tushitsü nükjidong nung iba sentong ayongzüka mungogo.

Sentong nung Lieutenant General Abhijit S Pendharkar, AVSM, YSM, General Officer Commanding, Spear Corps den civil aser police ketdangsür tejentem, veterans' organisations nungi züngsemtem aser lokti tentet balala lenirtemi shilem agia liasü.

Military lenir tejen ka iba sentong nung shilem agiba ajanga iba sentong koda tongtibang aji sayur, aser

veterans tem ajangzükdaktsütsü atema Armed Forces bendanga agütsür aliba sayur.

Nagaland kübok tesem balala nung officers, junior commissioned officers aser tanga rank nung alirtem densema Ex-Servicemen 700 shi-i iba sentong nung shilem agia liasü.

Sentong agiba mapang grievance redressal cell ka amenok, kong Ex-Servicemen tem tebilemtsütem bentettsütsü asoshi mangaoka yua liasü.

Benjung mapang sobaliba tsüsang saya koba ajanga Nagaland indang takar sobaliba sayuogo aser veteran tem aser nüburtem yongtsü nung telongjem tali adokdaktsüogo. Benjung ya lokti chiyong ka chiyongba sülen tembanga liasü.

GOVERNMENT OF NAGALAND DIRECTORATE OF HORTICULTURE NAGALAND: KOHIMA

NO.HR/DTE/ESTT-15/INTRV/2025/

Dated Kohima the Dec. 2025

ADVERTISEMENT

1. In pursuance to Administrative Approval No.HR/ESTT-2/RECRUITMENT/34/2025/287 dated Kohima the 9th July 2025, clearance of P & AR Department U.O No. 377, dated 9/06/2025 and concurrence of Finance Department RFC/ESTT No. 70/6 dated 1/07/2025, applications are hereby invited from eligible and indigenous inhabitants of Nagaland for filling up the under mentioned post under the Department of Horticulture in the manner prescribed below:-

Sl. No	Name of the Post	Pay Matrix	No. of Vacancy
1	Tractor Driver	Level-3	1 (one) post

- The minimum Educational Qualification required will be Class-VIII Passed
- The age of the candidate shall be 21 -32 years.
 - The upper age limit is relaxable by 5 (five) years in the case of candidates belonging to SC/ST.
 - For serving Government employees, the upper age is relaxable equal to years of service served subject to a maximum of 5 years. In-service candidates should produce "No Objection Certificate" duly counter-signed by the concerned Head of Department with Name & Office Seal, along with initial date of appointment.
- Eligible candidates are to submit their application with the required documents (Valid Driving License/ Aadhar Card/ Educational Certificate/ ST/Indigenous Certificate/Birth Certificate) along with 2 (two) passport photos and contact number to the Directorate of Horticulture, Nagaland, Kohima during office hour.
- Incomplete documents or expired Driving License will be summarily rejected.
- The last date of submission of applications shall be till 09-01-2026. Applications submitted prior to this advertisement should be submitted afresh. Application received after the last date shall not be entertained.
- Driving Test and Oral Interview will be conducted on 21-01-2026 at State Horticulture Nursery, Chumoukedima. All eligible candidates must reach the venue at 10:00 AM sharp.
- No calling letter shall be issued individually.

Sd/-
(AYIENO HIBO)
Director of Horticulture
Nagaland, Kohima.



December 18, 2025 nü Bay of Bengal nung Indian Coast Guard Ship nung sepaitemi apuba Bangladesh nunger angopur 35 noksa nung angur. India nunger tzü nung angu apuba atema sepaitemi Bangladesh nunger angu apuba rong ana nung nisung 35 aser angu seret 500 dak tali puogo.

Delhi nung mapa inyaker shilem 50-i pei kidang nungi dang inyaker

New Delhi, Luchii/ December 18 (Agencies): Delhi nung sorkar office aser nija office tem nung mapa inyaktertem shilem 50 bo pei kidang nungi dang mapa inyaksü tetuyuba agütsüba ama Brihostibar nungi shilem 50-i pei kidang nungi inyaker aser shilem 50-i office nung inyäk tenzükogo.

Iba ya yimti nung mopung kanga menenba nokdangtsü atema lir.

Delhi Labour Minister Kapil Mishra-i, "Office temi kidang nungi mapa inyaksü tuyuba amaji shidak benoka inyaksüla aser gari lemsatepa amshitsü atema mapa inyaktertem ajungshitsüla," ta metetdaksü.

Labour department-i, item tenokdangbaji shidak mebenshira Environment (Protection) Act, 1986 nung Arrla 15-16 nung ajemdaker temerenshi agütsütsü, ta metetdaksü.

Work From Home (WFH) tetuyuba jagi hospitals & health services, fire services, prison administration, public transport, electricity services, pollution control departments, forest department aser Delhi Jal Board bo malentsü.

Delhi sorkarisa, Delhi nung kisüjensüba mapa inyaktertem aser register süa alir shia nem sen meyrjang terer (10,000) agütsütsü, kechiyong GRAB kübok anogo 16 tashi yimti nung

kisüjensüba mapa ajak nokdanger, ta metetdaksü.

Delhi nung mopung kanga menenba aziüksü atema Grap 4 kübok kisüjensüba mesüra kiojen bendokba maparen ajak nokdangba den külemi Delhi telungi diesel trucks aittsü memelar. Iba dak alia Delhi sorkari PUC maliba garitem dang totzü mayoktsü tuyuba ama Brihostibar nungi benoka inyaker.

Taoba ita Delhi kiojen asüba nokdangba ajanga anogo shia aayangertem kanga mejungi kongshi, ibayongji sorkari register süa aliba kisüjensüba mapa inyaktertem shia nem senotsü teyari agütsütsü lemtet, ta Kapil Mishra-i metetdaksü.

R-Day nü tongti tejaokertemji EU lenir Ursula aser Costa na asütsü

New Delhi, December 18 (Agencies): Sangküm January 26 nü Republic Day parade nung tongti tejaokertemji European Commission Tir Ursula von der Leyen aser European Council Tir Antonio Costa na asütsü, ta osang ka ajanga metetdaksü.

Iba mapang nungjisa Delhi nung India-EU summit-a ayongzüka akatsü. EU aser India na tsüngda Free Trade Agreement agitsü nükjiong nung iba senden akatsü.

Commerce Secretary Rajesh

Agrawal-i, India-European Union tsüngda shishilembaba tezüngzüktep agitsü atema lenla aika nung rangloker inyakdar, ta metetdaksü.

Osangbenertem den jembidang Agrawal-i, "Onük aika nung o lemtepa arudar aser telemtetba agitetsüsa jembishinüdar. Iba tezüngzüktep agitsü asoshi lenirtem ajurua senden amenba den külemi online ajanga-a senden ayongzüka kadar," ta metetdaksü.

Free Trade Agreement atema India aser EU na tsüngda

senden 14 ben menogo.

December 3 nungi December 9 tashi EU nungi telok kati New Delhi semdanga liasü, aser December 8-9 anogotem nung parnoki Commerce & Industry Minister Piyush Goyal aser EU Commissioner for Trade & Economic Security, Maros Sefcovic na den senden amen.

December 7 nü Commerce Secretary Rajesh Agrawal aser European Commission Director-General for Trade na senden mena liasü.

Lok Sabha nung MGNREGA melen benokba VB-G RAM G Bill agizükogo

New Delhi, Luchii/ December 18 (Agencies): Brihostibarnü Lok Sabha nung Guarantee for Rozgar and Ajeevika Mission (Gramin) Bill (VB-G-RAM-G Bill) benoka ghonda 8 dak tali o entepba sülen iba bill agizükogo.

Iba bill ajanga MGNREGA melentsü.

Iba bill dak sendakba nung tasüngdangbatem Minister of Rural Development Shivraj Singh Chouhan-i langzüa liasü.

Opposition züngsemtemibo iba bill anema longkak ait.

Congress party aija Chouhan-i, 2009 küm general election agitsü aliba nung ajemdaker NREGA nungja nung Mahatma Gandhi tenüng inoksema liasü, ta ashi.

Congress MP Priyanka Gandhi-i, BJP-i scheme balala nungja Ato kilonser Narendra Modi nungtem nung jaloktsüner, ta aitsüba dak sendakba nung Shivraj Chouhan-i taoba mapang Ato kilonser Jawaharlal Nehru nungtem nung scheme aika ajaba metetdaksü.

MGNREGA nungja melentsü atema sorkari benokba aija Opposition-i,

sorkari Mahatma Gandhi mezüngmeshir aser Mahatma Gandhi National Rural Employment Guarantee Act 2005 nung alibatem melenshir, ta ashi.

Lok Sabha senden nung iba bill nung o entepdang Congress MP, KC Venugopal-ibo VB-G Ram G Bill ya Standing Committee ka mesüra Joint Parliamentary Committee ka nem agütsütsüla, ta benok saka Speaker-i magizük.

Osangbenertem den jembidang Venugopal-i, "Tanü Parliament nung democracy tepsetba kuli süa angur. NREGA nungi Mahatma Gandhi tenüng agienba ajanga parnoki democratic inyakyim aser linük tebuti tangatetbatem tepsettsü meranger," ta ashi.

Iba bill nung shia aliba agi, yimtsüngtem nung kibong shia nem mapa inyaka aayangtsü atema anogo 125 agütsütsü.

Iba bill agizükba sülen Hokolbar anüngdang 11:00 ako tashi senden thinena liasü. Asükwa mongpu Parliament ya December 1 nü tenzüka liasü aser December 19 nü tembangtsü.

Delhi nung mopung menenba atema Kejriwal-i BJP aser Congress na aitsü

New Delhi, December 18 (Agencies): Aam Aadmi Party (AAP) nung tongti lenir, Arvind Kejriwal-i Delhi nung mopung kanga menenba atema BJP aser Congress naprongla aitsüogo.

Kejriwal-i X ajanga, "Ato kilonser (Narendra Modi) Oman nung lir aser Opposition nung Lenir (Rahul Gandhi) Germany nung lir, aser linük yimtiba mopung temenen nung lir," ta metetdaksü.

Osangbenertem senden ka nung jembidang Kejriwal-i, Delhi nung mopung menenba ya Punjab nung alu nung jana arongba agi, ta joko mejembir, ta ashi.

"Joko alu nung jana merongra mopung menenbaji Delhi nungi adokba lir, anungji yangji telemtetbatem agia inyaksüla," ta pai metetdaksü. Graded Response Action

Plan (GRAP) Stage IV benokba ama telemtetba balala agia inyaksü melen ketdangsertemi AQI osang mimshitsü meranger, ta pai ashi.

Kejriwa-i, linük yimtiba ya 'gas chamber' ka kümogo saka Ato kilonser Narendra Modi-i ola madoker; iba tebilemtsü onük atema Centre mesüra Delhi sorkari tebilemtsü makar, ta ashi.

Kejriwal-i, Delhi nung AAP sorkar küm 10 aliba mapang nung yimti nung mopung yamaibo menena maliasü, kechiyong ozü sorkari telemtetba takang agia inyäk, ta ashi.

"Linük yimtiba gas chamber kümaka aser Ato kilonseri iba tebilemtsü onük atema meinyakra komaser nüburtemi mopung temerük agitsü?" ta pai asüngdang.



Prayagraj, December 18, 2025: Sorkari MGNREGA scheme nungja melentsü atema VB-G Ram G Bill benokba anema Prayagraj nung Congress party nung inyaktertemi longkak aitba noksa nung angur.

भारत सरकार
कारपोरेट कार्य मंत्रालय
त्वरित कंपोर्ट समायोजन प्रसंकरण केंद्र (सी-पेस),
आई.आई.सी.ए. बिल्डिंग, 7वीं मंज़िल,
प्लॉट P-6,7,8, से-5, आई.एम.टी. मनेसर, गुडगाँव,
हरियाणा - 122050.
Email: roc.cpace@mca.gov.in



सचिव ज्वरी

Government of India
Ministry of Corporate Affairs
Centre for Processing Accelerated
Corporate Exit (C-PACE)
IICA Building, 7th Floor,
Plot P-6,7,8, Sector-5, IMT Manesar,
Gurgaon, Haryana - 122050.
Email: roc.cpace@mca.gov.in

FORM No. STK --6
NÜBURTEM DANG SANGDONGER
[Pursuant to sub-section (2) and sub-section (4) of section 248 of the Companies Act, 2013 and rule 7 of the Companies (Removal of Names of Companies from the Register of Companies) Rules, 2016]

Public Notice:ROC/C-PACE/STK-2/248(2)/2025-26/1559Date: 12/12/2025

Temetettsü :
Tenüng agentsüba maparen nung (1) Nagaland state nung Companies Act, 2013 kübok section 248 nung aliba company-tem itemi :

S No.	Work Item	CIN	Company Name
1	AB9665536	U93110NL2015PTC008378	KOHIMA CRICKET LEAGUE PRIVATE LIMITED

2. Company Act, 2013 nung section 248(2) kübok ajemdaker yangi tekalen agüja aliba Company-tem nungi parnok tenzükür külen küm ka tsüngda mapa metenzüketba agi mesüra taoba küm ana tashi mapa kecha meinyaket süidaksüba agi mesüra Companies Act, 2013 nung section 455 kübok shia aliba ama mapa meinyaki anena aliba company ama ayutsü asoshi mapang tasazük tsüngda application (s) magütsüba agi mesüra mapa meinyaki anenba company (ies) akümba agi / company incorporate asüdang nangzükbä ama subscription sen magütsüba agi aser section 10A/ nung sub-section (1) kübok shia aliba ama company incorporate ser anogo noklang ka ser tir tsüngda mesangdongtetba agi section 12 nung sub-section (9) kübok shia aliba ama tsüngdong oa repringdangba sülen kecha mapa tenzüka maliba jangjangogo, aser parnoki parnok meyong register asüba company-ji anenadoknüba agi parnok tenüng company register nungi agentsü asoshi agütsüba application Registrar of Companies ket tongogo aser parnoki parnok tenüngji Companies register nungi agiendaksünüa temepishiba agüja lir.
3. Anungji parnoki mepishiba ama, tekalen agüja aliba company-tem ya Companies Register nungi tenüng agentsü asoshi Registrar of Companies-i shidanger.
4. Nisung kari danga companies register nungi tenüng agentsü asoshi metetdaksüba ya anema ken o agütsütsü lira , iba sangdong ya adokba anogo nungi zünga anogo semer tsüngda iba ken o ji yangi agüja aliba office address dangi yoktsü akok.

Irkan Tirkey
Deputy Registrar
Centre for Processing Accelerated Corporate Exit
CBC : 07123/11/0519/2526



TIR YIMYIM YIMOBILEM (EDITRIAL)

DIMAPUR FRIDAY, DECEMBER (LUCHII) 19, 2025

Mezüngmeshiba mapa!

Tanü asüngbo kecha telokia kecha yimtaka, akhidang amato yimtaklirtem prangpong agi tuitier amokmerenba aser pua bener aoba mangashir, kechiyong Naga yimten tebilemtsü koka tatem kati marutetaka, ibai India dena aser Naga nungur yimten nüchiso bushir teloktem tsüngda-a yimjung mapang lir. Anungji, ibai Naga nungurtem asoshi yimjung nung Naga yimten indang bilemdanga shisalemsatepba aser Naga lima takar kümdakja inyaktsüba mapang tajung ka lir. Ajisüaka, taoba anogo ishika jakdang, December 15 aonung ayaterem nung NSCN-K (Khango-Vusshe) nungi nisung kar tsükchir den rarai aoer ama prangpong injang bener oa Aoyimkü yimtak injang khatoka nisungtem amokmerener pua bener aoba mapaji tamashi mapa ka asütsü. Ashiko, Aoyimkü yimtak alirtem jagi parnoki maginüba mapa mesüra özüng raksaba mapa kar inyaka alitsüa akok, ajisüaka iba amajika alinunga, aji atema tsükchir tesepe amaki aoer ama NSCN indang raraba hadir bener oa inyaktsüba kecha nungdak madoker, saka yimtak yimten dang ashitsüla aser nungdak süra anogoa züngzüksütsüla, kechiyong NSCN-jia GPRN lir, anungji yimten mapabo yimteni inyaker ama government-i timi inyaktsüla. Ashiko, tang Aoyimkü nung inyakba amaji tangar yimtsüng ka nung inyak nungbo, tang ya kechi koma tensa kümer alitsüar meshiteter. Aji oda, yimtaka yimten aser lanu aiena mali ama mezüngmeshiba mapa ka atalokaka, yimtaklirtemi aremzüka jepdak nung kecha meshii yutsüba jagi nübortembo maksü ajuruogo saka nisung ajak asoshi tamangu lendongbo tuluka nungi kümzüko go ta bilemer. Atangji, tang ya Naga nungur linük tenzüker, telok koba südir sang, Naga nungur yim tashi oagi nisungtem amokmerenba mapanga masü aser koba kuli agi südir sang yimtak yimteni memetet nisung pua bener aotsüba mapang masü saka akhi Phizoba aser Imkongmeren nungur mapang nung ama, Naga yimten temeten o bener yimtsüng aser town shia nung nübortem den shisalemsatepba jajatsüba mapang asütsüla. Aji oda, külen Naga yimten nüchiso tangatetba aser teimla indang nübortem den jembir aser külen Naga yimten jenjang tajungba ka latettsü asoshi India den jembir ta anogo shia tesem ka nung mesüra ka nungbo Naga yimten temeten ken o ya telok nung jembidar asütsüla. Iba jagi Naga yimten nüchiso bushiba temeten milen mesepe jangrutsü. Aji oda, tang ama yimjung mapang nung India government-i lazüka yutsüba 'Camp' nung amongtsüa menügdaker, kechiyong India governmenti lazüktsüba "designated camp" ji shitakba nungbo tepuokdak, jail ki, amai lir. Idakji lia yimten ken o jembiba agi asenok mera maketer, anungji joko tangbo India-ia akhi amato masü, asenok akhüm metsübu kümogo. Ibaji mangatet ser asen kinunger 'Camp' nung alirtemi tang amaji yimtaklirtem bushia azüoktsü merangra, Naga yimten nüchiso bushiba lenmang aipeter aoer asütsü. Alima asünungji, yim shia nung tashi mangartema alitsü, ajisüaka itemji yimtak yimten nem tokjang saka yimten nüchiso bushirtem tongpangjibo pei nisung yimtaklirtem den raratsüba masü saka India-i kangshia asenok la temzüng kübok yua alinungji, iba talenba nungi salatsü atema India den jembitsüba Naga yimten nüchiso bushir, koba telok südir sang, parnok mapa asütsüla. Atangji, Naga yimten tebilemtsü melatettetba agi, talisa, Nagaland nung nübortem kangshir aser linük tenzükertembo kanga akoksadagi. Ibaji meteta, tang amaji yimtaki ayaterem nung prangpong injang bener moi, pei lima aser nübortem meimba shisatsü, yimten yimli indang temetetba aser Naga yimten nüchiso jenjang ka alangtettsü mulungtetba temulungjang aser shisatsü bener tesem ajaklen khena manen nübortem den jembia jajatsüla. Ibajang shitakba Naga yimten tongpang nung jagar asütsü. Iba jagibo tanü manguyonga, asüng lanu putu nungbo Naga yimten nüchiso angutsü.

OLEMSABANG

"ManokshibaLung"

~ Sakurepla Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

1. Tesanem kibong : Iba runem yabo onsara bala kati junga menemer to , Ya kechi runem? Aon balaka asor asü? Temang nung inokba terunem oset asü? Mesüra alima talang nungi bener aruba naro balaka nungi terunem adokerba asü? Yamai junga menemer nu ta anasa aliba ki balala nungi ola adokba angashi. Ya tanga kecha masü saka Taochilar kibong runem adokerba liasü.

Taochila ya Medemba aser Ashila na jala tantsüla lir. La tenu tetsür ka aser tebur chanu ka lir. Par kibong ya nübur ajaki nükshiba Khristan kibong tajung ka liasü. Taochir kibong nungi nübur jenti tansütsü masü saka tatishitsü tajung jenti nguteta litetba kibong ka liasü. Tebui anir parnok ajaki Tsüngrem meim aser arogo nunga züngsem tajung kaka liasü. Lar kibongi ajak den putepe aser jungtepa aliba yong ajaki saklok aser meim. Tsüraburi tajung inyaka sayu nung, tanurtemi aji angazüka pei aliba aser adenba lokti ajak nung yimya awashi tajungtiba agi awa oa benshi aser yamaji ali. Nüburtemi Taochir kibong dak yabo Tsüngremem remso ya iba kibong meyangerdang nungi kaor liasü südi ta sa kibok nung jembitep, kechiyong lar kibongji alimai dang junger ta masü saka Tsüngremia onsara junger ta shitettsüa lar kibongi junga litet. Taochila tebu tangar kübok süaka itasen tera jagi kibong tebok peria mesür aser iba den tetsüi kidang kibong nung tesüngmangtsü junga ketdangsüba agi, lar kibong tulur takar ama mesüaka, kenü danga tebok tazüng memejangdang aser sentsü kecha maliasü. Tsüraburi kechi agi peridaktsüdir iba jagi jala nulatem tenük sünger liasü aser tsürabur anati chirnur tajung asem moatsüba atema Tsüngrem nem tenüngsang teti agüja liasü. Lar kibong omenji Germany nungur theologian kati züluba "If the only prayer you ever say in your entire life is thank you, that will be enough(Taküm tepiyong ne sarasadem onükji kanga pelar dang süra aji teperi)" nung ajemdaker kechi tensa arudir aruaka, asen kibongibo Tsüngrem tenüng sangjen dang asangtsü ta tsüraburi anir kibong ajaki ali. Saka iba kibong dangi yakta alima nung aikatibo majangshiba tsüngsak mopung tulu ka arua Taochilar kibong anoksatsütsü ta shingai ya yimdangi marui liasü.

Yamai ya ataloker nu? Anepdang züngia Taochi tebu ain kati aotsü atema kibong ajak yakta saaker pa atema ilonga aritep. Tetsü soruchioker, tanur asem tebu dang ainlen nungi kidangi shilangdang nangzüka ama tsüngsem alir arutsütsü shijen ashir ta lar kibongji aritep. Chi chiyunger külen, tsürabur ana aser chirnurtem sarasadem külen tebu parnok nungi pila ain jagi ao. Joko school-i aotsü mapang atonger asünung yakta tanur asemji renemer külen tetsüi parnok school bus nungji yok. Akhi ama, tetsü ka teinyaktsü mapatemji tenzüka Ashilai ki mapa inyaktsü tenzüker. Mapa inyaka alidang kidangi kodanga mengudangba tetsür ka Ashilar kidangi aru. Idangji tetsüi nisung tasen süaka, pelaa agizük aser la mapa inyaka aliba ajak toktsür la denji amen. Tetsüla jagi la tenüngji Ajungla ta ashi aser ano Ashilai kecha melangzüdang yakta dang Ajungla jagi la ya Taochila tebu den joko mapang tatsüka medemer aser la mashisa lir aser tanurji Medemba indang ta ashi. Ashilai ibaji angashia kinungboi la mesüshir ta bilem saka kodang la madang aliba tetsüla tejak nung lai ranglok, atangji ya mesüshir masü saka shitakba ta lai yimdangi aru. Ashila temulung raksabaji balakati liasü saka lai ibaji aremzüker Ajungla dang iba oji shinga danga mashitsü saka kinungbo arur tena tsüngda o tatsü talang ajak jembir külen lar asem tesendaktep ya bendangtsü ta shir lai Ajunglaji kidang nungi aotsü mepishi. Ajunglai aji angashia kecha melangzüi dang ayazüka ao. Ashilai kecha masü amai dang ki mapa inyaktsü tenzüker saka la temulung animesüngzüki ajepztzü tenzüker. Lai Tsüngrem dang lai angashiba khuret tuluji shia ajep. Idangji Medembai pa tongogo ta ashitsü phone aru aser lai agizüka pelaseta dang jembir. Ashila temulung raksaaka lai kinungbo den pelaa dang jembir phone-ji asep. Ashilai Ajungla dang shinga danga tebuba tena tsüngda medembaji mashitsü ta shir yokbaji tanga kecha agia masü saka Ashilai lar kibong meraksanüba yong liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Mumbai nung Khristmas Music festival nung nisung 25,000 shi aden



December 14, 2025 aonung Mumbai nung tzüymkümlen Khristantem aika adenshia Khristmas music festival nung adenba noksa nung angur. Küm shia Khristantemi longjemer Prabhu Yeshu Janmotsav (Kibuba Yisu asoba benjungmong) amonger.

Mumbai, Luchii/December 18 (Agencies): December 14, 2025 aonung south Mumbai nung tzüymkümlen Khristantem dang masü saka tanga yimsü amangertema densema nisung 25,000 shi Khristmas music festival ka nung aden.

Küm 60 tejaklen Prabhu Yeshu Janmotsav (Kibuba Yisu asoba benjungmong) ya tenzükba sülen küm shia December ita nung Khristantemi iba benjung ayonga amonger.

Iba sentong nung Catholics, Methodist, Church of North India, Pentecostal, Baptist aser Evangelical Khristantem aika aden.

Taküm agi küm 60buba iba sentong ayongzüka kaogo. Iba sentong nung adentsü atema India tesem balala nungi Khristantem adenshir.

Bombay nung archbishop, Cardinal Oswald Gracias-i, "Tesüiba küm aika iba sentong agia aruba ajanga tamangertem longjemdaksür," ta metetdaksü.

Paisa, "Yisu Khrista ya yimjung chuba dang masü; Pa ya yimjung lir. Anungji iba yimjungji asenok dak alitsüla aser taneptsü aginüba lima ka nung iba yimjungji tangar den-a lemsateptsüla," ta lokti ayongzüka liasü.

December 15, 2025 nü osangbener den jembidang organizing committee nung chairman, Abraham Mathai-i, "Iba benjung ajanga Khristantem dang masü saka Hindu, Muslim aser Sikh nungera puar. Iba benjungmong ya Mumbai nung Khristmas benjung tongti maitsü ka kümogo," ta metetdaksü.

Taküm iba benjungmong (Prabhu Yeshu Janmotsav) omenji "Timtem aliba lima ka nung ajak asoshi yimjung aser teimla" liasü.

India tsür cricketer, Jemimah Rodrigues tetsü, Lavita Rodrigues-i, "Moapu nung nisung jenti adenshiba ngua ni kanga süngmanga liasü. Yisu asoba benjungmong nung nisung 25,000 dak tali aden," ta metetdaksü.

Iba sentong nung Jemimah tenüng nung lar tsürabur, Lavita aser Ivan Rodrigues na nem

tetushi agüja liasü. Tawa Indian women cricket team-i takok tulu anguba nung Jemimah Rodrigues-i tongti shilem agiba asoshi la nem tenünsang agütsü.

Osangbener den jembidang Lavita-i, "Choir telok aikati tepela Khristams ken atenbaji kodak mesüka liasü. Nisungtemi teka maa tsünsanga Tsüngrem nem tenünsang agütsü. Iba ya atangji kodaker tepela liasü," ta metetdaksü.

Taoba mapang Maharashtra State Minority Commission nung vice chairman inyaksang aser Prabhu Yeshu Janmotsav organizing committee chairman, Abraham Mathai-i, "Iba sentong nung Konkani, Marathi, Malayalam, Tamil, Hindi, Punjabi, Gujarati aser English densema oshi aika nung Khristmas ken tena liasü," ta metetdaksü.

Iba sentong nung jembidang Protestant pastor, Rambali Singh-i, "Asenoki ajangshiba timtem balala dang nungi Tsüngrem tashi taitba aser asen

tsükchirtem dang nungi Tsüngremsa tashi taitba. Asenoki Pa dak tamang akatsü nüngdak," ta ayongzü.

Tesülen osangbener den jembidang Singh-i, "Tang agi trokbenbuba ni iba benjung nung adener, aser küm shia nisung teimba-teimbi iba sentong nung adener," ta ashi.

Pastor Singh ya Dehradun yimti nungi lir.

South Mumbai Women's Wing of Methodist Church nung Tir, Deepa Cornelius-i, "Putir aser pastor 60-i Khristmas ken atandang loktii teka maa liasü. Mumbai nung ayongzüka akaba Khristmas benjung ya tongti sentong ka kümogo," ta metetdaksü.

Prabhu Yeshu Janmotsav benjung ya mezüng 1965 küm taoba mapang Maharashtra nung Angh, P. V. Cherian kinüngtsü, Tara Cherian-i ayongzüka liasü. Iba mapang nungjagi tenzüka küm shia Mumbai nung iba sentong ayongzüka amonger.

ANOGO ABEN TSÜNGREM DEN

Kodang Nisungtemi Na Sempar

T. Ken 52:1-9

Alimeleck putir ka liasü shibai Dawid yari. Ibayongji Sauli pa kin ashioktsür ka kümdaksü, aser pa aser par kinünger tepsettsü ozüng agütsü. Kodang Dawidi iba indang angashi, pa jashia liasü aser iba ken zülu.

T.Ken 52 nung nisung majungba indang leman asemsü nung rasaa ashir. Mezüngbuba, Dawidi mezümekümba nisung indang ashir (t.1-4). Doegji Esau nungi jakzük, shiba alima yimya sayur (Ibri 12:16). Esau nungi jakzükertemji Yihuda nunger tsükchir. Doegji tebilem nung Bendanger Yihuda nung akümba asütsü akok. Pa tashi tait aser takar süaka, pai pa tashi Tsüngrem nungi magizük. Doegi asüküm aser pai tamajung meimba jungkai adoktsü. Ti yazü jembitsübaji lendong (2 Tim 2:11; J.Adok 22:15). Doeg yimya nungji ochiji tai nükjidong nung ti yazü ashitsü akok.

Tanabuba, Dawidi ochi o bendanger indang ashi (t.2-7). Tsüngremi nisung tamajungji raksatsütsü aser akümlir lima nungi atsüdoktsü. Shirnoki pei tashi dak metaloker alir, kenü parnok atsüdoktsü aser raksatsü.

Tasembuba, Dawidi takokba kilir indang ashir (t.8,9). Tsüngrem ki nungi Pai olive Süngdongji angu. Tsüngremi pa anepalutsü ta pai metetta liasü, pai süngdong anepaluba ama aser tashi pa nungi agiba ama. Dawid tema liasü, azükaru aser Tsüngrem tushi.

Kodang nisungi asenok dang tamajung inyakdir asenoki Tsüngrem dak rangloktsüla-Tsüngrem ajungba dak, tamajung nisung dak masü. Maneni süngjang agüjang aser timtem mapang nunga Tsüngrem tenüng sangang.

Tangari tesempa agi ne dak tenük yoka aka na takoker asütsü akok. Kari na tesempa agi amshitsü akok, Tsüngrem dak ranglokang, mapa Tsüngrem ket nung tokjang aser Pa tenüng tushiang.

Gujarat nung state sorkari Khristan missionary school ka agiadok



December 18, 2025: Gujarat state sorkari Khristan missionary school ka nem tai tonglokja iba school agiadokba tatalokba Khristan lenirtemi sashia aitsüogo.

Ahmedabad yimti kübok Maninagar kiyong nung aliba Seventh-day Adventist Higher Secondary School ji ketdangsütsü atema BJP sorkari Ahmadabad nung district education officer (DEO) shimogo, ta osang ka ajanga metetdaksü.

December 17 nü osangbener den jembidang iba school nung headmistress Mayurika Patel-i, "December 16 nü district education officer-i iba school bendanga agiogo," ta metetdaksü.

Taküm August 19 nü school kima kaketshir kati kaketshir ka kotari agi tsüingseta liasü. Iba

mapang nungjagi tenzüka sorkar ketdangsertemi iba school nem tai tongloktsü tenzük.

Iba tatalokba bushisüngdangba sülen district education officer-i, "Iba school dak tamang katettsüsa masü saka school ketdangsertemi junga ketdang mesüteter," ta aitsü.

Paisa, iba school nung kaketter jenjang kanga tasak agi ayoker, 'lease' telatetbatem mebenshir aser ti yazü affidavits agütsür, ta aitsü.

Paisa state sorkar dang iba school ya sorkari agiadoktsüla, ta benoka liasü.

School headmistress Patel-ibo, item osangji khenyongi ti yazü, ta shiogo.

Laisa, "Iba school ya tenzükba sülen küm 46 jungogo aser iba school ya Council for the Indian School Certificate

Examinations (CISCE) den affiliate süa lir. Sorkar telatetbatem ajak inyakba sülen ang affiliate asür, süra kechiba state sorkari ochimashi nung ajemdaker onok nem tai tongloktsür?", ta asüngdang.

School-i sorkar anema Gujarat High Court nung ken o benoktsü, ta lai metetdaksü.

1979 küm mezüng iba school tenzükdang kaketshir 18 dang liasü, ajisüaka tangbo iba school nung kaketshir 11,000 dak tali aser tesayurtem den staff ajak senteper 650 lir.

Khristan lenirtem aikati state sorkar aija, iba ya Khristan school tajung ka tenüng menüksütsü nükjidong nung inyakba lir, ta aitsü.

Ahmadabad nung Jesuit putir Cedric Prakash-i, "Iba ya nütsüng ajema aliba Khristantem anema inyakba lir, kechiyong iba ya Khristan school lir," ta ashi.

Osangbener den jembidang pai, "School tajung ka ketdangsertem ket nungi tashi agienba ya tim masü. Tajemdakdak kecha makai tai tongloktsüogo. Timtem kar ali ka süaka ibaji legal inyakyim

ajanga dang bentettsüla," ta ashi. Nütsüng million 63 aliba Gujarat state nung nütsüng shilem 0.5 shi dang Khristantem lir.

2020 küm sorkar report ka ajanga ashiba agi, India nung Arogo organizations-i lapokba Khristan school 54,937 shi lir aser item school nung tanga yimsü amanger tanurtem densema kaketshir million 25 dak tali lir.

India nung Khristan school aika Roman Catholic, Protestant aser Baptist densema Khristan organizations-i lapokba lir. Aiben item school dang "missionary schools" taka ajar, aser item school nung azüngertemji Khristantem dang nungibo tanga yimsü amangertem teimba lir.

India nunger shisaliok nung Khristan school temi tongti shilem agir. India nung taoba mapang Ato kilonsertem aika densema yimtenren lenirtem aika Khristan school tem nung züngetba lir ajisüaka Hindu yimsü alia amanger teloktemi mapang shia Khristan school tem anema inyaker.

AO OSHI ANGAZÜKDAK:**TANÜ ANGAZÜKTSÜBA OJANG****Tsüngoktsü**

(v) teka mesüra nü agi yirutsüba (strike by hand or spear)

* Samarobai Takoba dak tsüngoktsü.

Tsüngpet

(n) junga metsüngshi (missed in spearing)

* Lanubai ak tsüngpet.



Tir Yimiyim

OLONG PAITEP # 7364

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünusenbongsü adokdak - (3)

OLONG PAITEP # 7363 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Söjak, 10. Aonung,
11. Dokan, 13. Tinu.

NAI-A YA METETTER

Chiyongtsü melalutsü atema France ya supermarket ajak dang meyokmaba chiyongtsütem sensakertem nem agütsütsü asoshi tetuyuba agütsüba mezüngbuba linük kümogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Arunachal Dy CM-i power connectivity tajung nüngdakba lemsatep

Itanagar, Luchii/December 18 (Agencies): Arunachal Pradesh Deputy Chief Minister Chowna Mein-i Bodhbarnü, Power Grid Corporation of India Limited (PGCIL) ta dang mapa tembanga inyaksü atema mapang atakzükja aliba shitak benshitsü aser taruba power generation project tem den külemi transmission infrastructure tembanga yanglutsü ayongzükogo.

Itanagar nung transmission aser distribution network akangshitsü atema sentongtem dak sendakba nung lepareprangshiba senden ka ayongzükä amenba mapang Mein-i, generation facility tasentem nungi power evacuate asütsü atema state kanga junga renema alitsüla, ta ashi.

Pai ashiba agi, Lower Subansiri Hydroelectric Project commission asüba den tanga project tem aika inyaksü aliba mapang power agütsüba nung menomeyang masütsü atema jelia transmission line tem inyaksangshia atadaksütsüji kanga tongtibang lir.

Deputy Chief Minister-i ashiba agi, electricity ya kidang nüngdak peritsü atema dang masü saka iba yagi shisaluyim, healthcare service, mapa inyaksü asoshi maongka agütsüba, industry atsülanga aotsü aser Arunachal Pradesh rongsenketzüng terenlok nung tongtibang shilem agir.

Mein-isa, power connectivity takang amenoktsü, minprong mesü electricity supply tajung agütsütsü aser jila aser kinük

nung aliba tesemtem naprongla nung liromedema terenlok bener arutsü atema sorkar bendanga agütsü aliba nenshia metetdaksü.

Senden nung shilem agiba ketdangsürtemi scheme kübok terenloktem indang metetdaksü, kong transmission aser distribution facility balala commission asüba, transmission corridor tongtibangtem tembanga yangluba densema liasü.

Senden nung Assembly Speaker Tesam Pongte, Deputy Speaker Kardo Nyigyor, minister tem aser ketdangsür tejentemi shilem agi, shirnoki state nung power infrastructure takaratiba nung renloka odaksütsü atema sensaksema liasü.

AJPtir-i 2026kümelectionnungBJPtsükdaksütsü nangzük

Guwahati, Luchii/December 18 (Agencies): Assam Jatiya Parishad (AJP) tir Lurinjyoti Gogoi-i party sentong ka nung o jembiba mapang 2026 Assam Assembly election nung Bharatiya Janata Party (BJP) pur tsükdaksütsü ta ashi.

Tinsukia district nung Sadiya kübok Chapakhowa tesem nung Party amenoker küm pongu ajungba anogomung amungba mapang pai iba olen lemsatepa liasü.

"2026 küm BJP pur ajunga raktoktsü. BJP puri Assam nung loki tentet mepetmesüi idaktsüogo. Onok tamendakdak tejangja; onok dak kechi tashi ali aji agi onoki BJP den raratsü," ta AJP tir Gogo-i ashi.

Gogoi-i ashiba agi, temzüng ozüng kübok democracy inyakyim dak ajemdaker Assam

nunger ali, maitsü, sobaliba aser yimden yimsüsüba nung tarutsü kümzüka toktsütsü atema AJP puri inyaksü.

Paisa, Chaolung Su-Ka-Pha, Srimanta Sankardeva, aser Madhavadeva nungeri amendaka toktsüba tangatetba aser nükjidongtem BJP yimsüsüba kübok mepetmesü nung lir, ta shia par party-i "communal politics" anema takokba tashi jenjang agitsü, ta shisem.

Kasa mapang nung AJP general secretary Jagadish Bhuyan-i ashiba agi, 2026 Assembly election atema par party-i Sadiya nungi nüboyimba sentong tenzükogo. Opposition tem longjemtsü nüngdaker ta shia Bhuyan-i ashiba agi, BJP anemba party temi vote melemdangdaksütsü atema

ajaki mulunga agizükba candidate tem yoktsü telemtetba agiogo. Paisa, nationalism aser regionalism tenüng nung nüburtem aiben ashiocksüba ajanga nüburtemi tamang makateti kümogo ta ashiba den, nüburtem nem tanaben tamang katetdaksütsü asoshi AJP puri inyakdar, ta shisem.

Party lenir yagi ashiba agi, mapang tatsüka tsüngda AJP ya kanga tongtibang tashi ka kümogo. Bhuyan-i ashiba agi, party tentetba sülen anogo 100 tsüngda party-i vote lakh tenetshi angu, aser iba ajanga nüburtemi Assam nung regional party tanga ka pusem tenzükba sayur.

Sentong nung party worker aser pusemer 5000 dak temai shilem agi.

IDP tem amakba Manipur Congress MP-i aitsü

Imphal, Luchii/December 18 (Agencies): Manipur nungi Congress MP A. Bimol Akoijam-i Brehostibarnü, tawa pei kidangi meyipa or aliba internally displaced persons (IDPs) tem kanga junga sentong yanglur amaker ta shia, iba tatalokba ya minprongtsüka aser iba ajanga tang security dak sendakba nung inyakyim benoka aliba nung metongmejen aliba sayur ta ashi.

Osangbenertem den sensaksema mapang

Akoijam-i ashiba agi, tawa tatalokba ajanga disarmarmed inyakyim shitak benoka minyakba sayur, aser lendong nung aliba nüburtem tekümzüka kübok toktsütsü aser rehabilitation atema sorkar inyakyim süoki ia bilemdaksü tenzükogo.

"Sentong kanga junga yanglur amakba ajanga disarmament inyakyim shitak benoka minyakba sayur. Iba ya kanga dang ken o tongtibang ka lir aser sorkari tangsa tang jenjang tapet agitsüla," ta

Congress MP yagi ashi.

Akoijam-isa, pai iba ken o ya Parliament nung benokogo aser Centre dang security inyakyimtem asadangshitsü aser metongmejen alibatam inyakhitsü takhangba agütsüogo, ta ashi.

Maneni pai, IDP tem tekümzüka kübok metoktsü tashi aser lendong agi konshir aliba lokritem tsüngda kati ka dak tamang katepdaksütsü atema jenang tapet magi tashi pai House nung iba ken o ya benoktsü ta ashi.



All India United Democratic Front (AIUDF) tekolakba Badruddin Ajmal-i Brehostibarnü Congress aser Bharatiya Janata Party (BJP) naprongla aitsüogo aser ashiba agi, Assam nung BJP mintoktsüji AIUDF indang onük tongtibangtiba asütsü.

US-i Taiwan dang sen \$11bn jenjang nok-nü ayoktsü agizükogo

Washington, Luchii/ December 18 (Agencies): United States-i Taiwan dang sen \$11.1bn jenjang nok-nü ayoktsü agizükogo, koba pei sasa yimsü asüba asetkong atema Washington-i nok-nü timtiba ayoker asütsü. Beijing-i iba asetkong ya mainland China den lungjemdaksütsü nangzüka lir.

Tir Donald Trump-i Bodhbar aonung menur linük ajunga nung television ajanga jembidang US State Department-i iba tezüngzüktep ya sangdonga liasü.

Tang ayoktsü sentong aliba nok-nü tem nungya sem \$4bn dak tema jenjang High Mobility Artillery Rocket Systems (HIMARS) 82, Army Tactical Missile Systems (ATACMS) - defence systems dena lir, aser iba mesük US-i Ukraine nem Russia-i tayimtsü amshia amakba nungi nokdangtsü asoshi agüja arur.

Iba tezüngzüktep nungya self-propelled howitzer artillery system 60 aser iba dak sendakba osettsüset sen \$4bn jenjang aser sen \$1bn dak tema indang drones dena lir.

Iba tayoktsü oset nungya sen \$1bn dak tema jenjang military software, sen \$700m dak tema jenjang Javelin aser TOW missiles, sen \$96m jenjang helicopter spare parts aser sen \$91m jenjang Harpoon

missiles atema refurbishment kits dena lir. Nok-nü ayoktsü tezüngzüktep indang sangdong tejangja balala agütsüba nung, item hadir ayokba ya US linük, rongsenketzüng aser security tejangraba ama Taiwan indang armed forces tajungba kuma yangluba nung yarıba aser "credible defensive capability" alitsü asoshi lir, ta Pentagon-i ashi.

Taiwan indang defence ministry aser tir indang office ajanga iba osang pela agizük aser China indang foreign ministry nungi telangzüba agüja mali.

Washington-i nok-nü aika Taiwan dang ayokba ajanga China kanga ain adoktsü, shiri Taiwan ya par litsü nung shilem ka ta kibur akumer aser par yimsüsüba küboki bener arutsü atema tashiyim amshitsü amokmerena lir.

"Taiwan pei peri defence tashi anepaluba nung aser tsükchir den raratsü tashi tulu kanga kera yangerba nung United States-i maneni yarir," ta Taiwan indang defence ministry ajanga sangdong ka nung ashi.

Taiwan-i defence sector maneni tajungba kuma yanglushitsü aser defence resilience ajunga tashi itshia asen sasa asenok kumzüka ayutsü temulungtetba aser tashi ajanga yimjung wazüka ayuba

sayutsü," ta Taiwan tir office indang odongtar Karen Kuo-i ashi.

Bodhbarnü China indang Taiwan Affairs Office ajanga, US Congress-i Taiwan dak sendakba bill tem agizüktsü merangba anema nokdaker aser US aser Taiwan tsüngta military contact yimya kecha nunga magizüker, ta ashi.

"Onoki US dang one China principle aser Sino-US joint communiqués asem nung shia aliba sülen anidaktsü ajungshir: Taiwan nem nok-nü agütsüba anenang, iba dak sendakba bills tem lepa reprangshiba anenang, aser China indang linük telungzük inyakyim nung teka amoshiha anendang," ta Taiwan Affairs Office indang odongtar Zhu Fenglian-i sangdong ka nung ashi.

Taiwan yimten yimsüsüba nung lenirtemi nüchiso bushir aser iba asetkong ya "war porcupine" ka kumdaktsütsü asoshi bendanger tashi amshitsü mulunga lir, koba ajanga nüburtem cannon indang chiyongtsü akumtsü, koba tesembatsü asütsü, ta Zhu-i ashi.

Taoba ita Taiwan Tir William Lai Ching-te-i 2026 nungi 2033 tashi atema \$40bn supplementary defence budget sangdong aser national security nung atsüanem akatsü mali ta ashi.

Zelenskyy-i EU lenirtem dang tekumdangtsü ashi



Brussels, Luchii/December 18 (Agencies): Brussels nung European Union lenirtem adenshia senden mena alidak Ukraine Tir Volodymyr Zelenskyy-i Russia indang senotsü soita aliba ya Ukraine indang mitkar aser rongsenketzüng nüngdak nung yaritsü atema apujang ta ajungshia liasü.

EU nung Russia indang sen €210bn (£185bn; \$245bn) jenjang rongsen ya Belgium nung amenoka aliba Euroclear-i soita lir, aser tang tashi Belgium aser iba bloc nung danga züngsem kari "reparations loan" ama iba sen amshitsü memulunger ta ashir.

Russia-i EU dang iba sen mamshitsü shia lir, saka senotsü teyari tali magütsüra Ukraine indang senotsü ya ita ishika nung agimatsü.

"Asenoki telemtetba tajung ka agitsü ni imlar. Iba ya maden nungbo Ukraine asoshi tebilemstü tulu asütsü," ta Zelenskyy-i ashi.

Iba rara nung tongtipang mapang ka Brussels senden ya amener aser Russia-i Moscow court ka nung par sen meyipa angutsü meranga Euroclear anema ken o ka benoka lir.

European sorkar indang ketdangsür kati tezüngzüktep ka yanglutsü teimla terabo lir ta shiogo. European Commission chief Ursula von der Leyen-i tangatettep kati marui senden yutsür maotsü ta ashi.

Nisung ajaki Belgium Ato Kilonser Bart De Wever dak tenzük rangloka lir, shibai Brehostibarnü Belgian parliament nung, "Belgium tangatetba ni melenshitsü asoshi ajungmesotsüsa tezüluba kecha ni ano mangu," ta shia liasü.

Russia-i tashi ajak amshia February 2022 nungi Ukraine amakba ajanga tenzükba rara ya tembangtsü atema tezüngzüktep ka yanglutsü kanga anasai arua lir ta US Tir Donald Trump-i ashi.

Yimjung sentong ka asoshi maneni jembishinütsü atema US

aser Russian ketdangsürtem Miami nung tan hopta tatemlen ajuruteptsü lir, ta White House ketdangsür kati osangbener dang ashi. Kremlin envoy Kirill Dmitriev-i Trump envoy Steve Witkoff aser Jared Kushner den jembishinü akatsü südi ta bilemer.

Ukraine ketdangsürtema US-i aor, aser Tir Volodymyr Zelenskyy, shiba Brussels nung ali, pai osangbener den jembidang, rara manenra par sepaitem yaritsü atema mesüra rara agi raksar aliba nungi shia arutsü atema sen ya nüngdaker, ta shia liasü.

Yimjung sentong tasenba nung Russia-i ano telangzüba magütsü, saka US teyari nung Ukraine asoshi European-i aniba multinational force magizüktsü, ta Kremlin-i nenshia ashi.

European Commission - EU indang executive teka - yagi Europe nung aliba Russia nunger rongsen sen €210bn nungi taruba küm ana tsüngta Kyiv nem sen €90bn (£79bn) shi aputsütsü sentong lir.

Ibaji Kyiv-i 2026 aser 2027 ajangtsü atema nüngdakba sen €137bn asemsü nung shilem ana amai lir.

Tang tashi EU-i Ukraine nem Russia indang sen tetemlok agüja arur saka sentong magütsür.

Office of the REJUSANGER CULTURAL CLUB SUNGRATSU KANGA PELAR

26th Edition Hornbill Festival Dec 1 to 10 Kisama 2025, Ao kin tenüng nung ozü Rejusanger Cultural Club tena liasü. Kanga dang jangratema monger tangazükba aika bener yimdaki shilanga aruogo. Nenok teyari maden nungbo onok tazüngla liasü, Talisa asen yimer Kohima yimtiba nung alir kija aser kibong, Sungratsu Senso aser Sungratsular Telongjem-i nungita yarıba kisung masu nubo, rongsen aser chiyongtsu jenti agi yari nung kanga dang pelar.

Ano onok lokti atema shirnoki sarasademtsüogo kanga dang pelar. Onok rongsen maka shisabolua aliba mapang item kibong, kija aser lokti-i ozü club nem rongsen tulu agütsüa nüngdak peridaktsü nung kanga dang pelar aser parnok dang tenüng jeta pelaba lemsar. Tsüngremi kija, kibong aser lokti ajak moajang ta ozü club sarasadem.

- Rejusanger Cultural Club
- Miss Evelyn Aier Dimapur
- Mrs. Supongtula Aier Dimapur
- Miss Moakumla Aier Kohima
- Dr. & Dr. Martsuden Walling Mokokchung
- Mejensanger Puto Yimden
- Mr. & Mrs. Bendangyapang Aier Kohima
- Rev. & Dr. Sentisashi Aier Kohima
- Mr & Mrs. Temjenjungla Jamir Costa Rica
- Mr. & Mrs. Chubayanger Aier Kohima
- Mr. & Mrs. Sentianger Imchen IAS Kohima
- Sungratsu Senso Kohima
- Sungratsular Telongjem Kohima
- Mrs. Imchasangla Walling Mokokchung
- Miss. Temsunaro AierKohima
- Metsubo Jamir Minister RD & SIRD Kohima
- Prayer Home Sungratsu
- Mr. Imsenperong Wati ADC Tuli,
- Mr. Atsungba Walling ADC Mkg
- Mr. Watikumzuk Walling SDO PHED,
- Dr. Talang Walling
- Miss Pangjungkala SDO PWD (NH)
- Kohima Jangpetkong Senso Telongjem
- Mr. & Mrs. Sentiwapang Aier Kohima
- Chiyongtsu tenlartern
- Mrs. Merenwala Jamir APW Alongchen
- Mr. & Mrs Mangyanglila Mkg.
- Mr. Penlichang Sungratsu
- Mr. & Mrs. Sungkalemba Jamir Kohima
- Nokzenketla & Lanukala Kohima
- Mrs. Sentisenla Walling Mkg

Sd/-
(KUMZUK AIER)
Troupe Secretary

GOVERNMENT OF NAGALAND
MOTOR VEHICLES DEPARTMENT
OFFICE OF THE TRANSPORT COMMISSIONER
KOHIMA-797004, NAGALAND
email: commrtrans-ngl@nic.in
No.TC/IT-4/2015/2950
Dated 18th December, 2025

NOTICE INVITING E-TENDER

The Motor Vehicles Department (MVD) invites e-Tender for Supply of IT Equipment, from IT empanelled Firms under the Department of IT&C, Government of Nagaland. Interested Bidders may visit the portal <https://nagalandtenders.gov.in> for more details and download the e-Tender Documents. All bids should be submitted only through the e-Tender Portal <https://nagalandtenders.gov.in> and bids submitted through any other means shall not be accepted.

Important Dates	
Publication/Issue Date	18.12.202516:00 Hrs
Bid Document Download Start Date	18.12.202516:00 Hrs
Bid Document Download End Date	20.01.2026,15:00 Hrs
Bid Submission Start Date	20.12.2025,15:00 Hrs
Bid Submission End Date	20.01.2026,15:00Hrs
Date and Time of Opening Technical Bids Submitted	21.01.2026,10:30Hrs
Place of Opening Bids	Office of the Transport Commissioner Kohima, Nagaland.
Officer Inviting Bids	Shri. Elias T. Lotha Transport Commissioner

Sd/-
(ELIAS T. LOTHAS)
Transport Commissioner

Nagaland nungi Muaythai asayartemi takok tajung angu



Dimapur, Luchii/December 18 (TYO): Agartala Tripura nung December 15 nungi 17 tashi Northeast India Muaythai & K1 Championship aser CSD Fight Night asayaogo aser iba asayamung nung Nagaland nungi Muaythai asayartemi takok tajung nguogo.

Northeast India Muaythai aser K1 Championship den CSD Fight Night (India vs Nepal) ya Combat Sport Development (CSD) Foundation, Tripura aser All Tripura Amateur Muaythai Association na longjemer ayongzüka liasü. Asayamung ya NSRCC Stadium, Agartala, Tripura nung December 15 nungi 17 tashi asaya liasü.

Team Strike-Fit Academy,

Nagaland nungi asayartemi kanga junga asaya-a gold 8, silver 2 aser Bronze medal ka densema medal 11 angu. Medal anguba den team nungi asayar Vihuto Sema (67 kg Pro Fight)-i Nepal nung asayar ka den asayaba professional debut bout koka liasü.

Gold Medalists

1. Aputo - 45 kg, Male, Under-23
2. Hisato Ayemi - 54 kg, Male, Elite
3. Pikato V. Awomi - 57 kg, Male, Under-17
4. Anazi Anar - 60 kg, Male, Elite
5. Niuka Chophy - 60 kg, Male (K1), Under 18
6. Phongmei Phom - 67 kg, Male, Under-23
7. Ravi Raj Chauhan - 60 kg,

- Male, Under-23
8. Lemnon Konyak - 45 kg, Female, Under-23

Silver Medalists

1. Ringpal Dey - 45 kg, Male, Under-17
2. Huka Ayemi - 54 kg, Male, Under-23

Bronze Medalist

1. Moangtemjen Imsong - 48 kg, Male, Under-23

Strike-Fit Academy nungi asayar 12 ya Coach Kru Hemavi, Team Manager Pekingto Y. Jimo aser Technical Judge & Referee Moakumzuk Longchar nungeri meiner oa liasü.

Iba asayamung ajanga Nagaland aser Northeast nungi Muaythai aser K1 asayartem tajungba asayayonga aoba sayuogo.

Mohun Bagan dang senchi \$100,000 achi



Luchii/December 18

(Agencies): India indang football club Mohun Bagan Super Giant nem Asian Football Confederation tetoktepba nung shilem magitsü atema tenokdangba agütsüba den senchi \$100,000 dak tema chiogo. September ita Asian Champions League Two nung Sepahan SC den asayatsü atema Iran-i maotsü atema telemtetba agiba sülen iba temerenshi agütsüogo, ta AFC-i metetdaksü.

AFC indang disciplinary aser ethics committee-i Mohun

Bagan pur 2027-28 season tashi Asian tetoktepba nung shilem magidaksütsü telemtetba agiogo. Parnok taruba season atema qualify süatokogo saka masayatetsü. Indian champions dang ya senchi USD 50,000 achi aser AFC aser Sepahan na akoksadaksüba atema ano USD 50,729 agütsütsü tetuyuba agütsüogo. Maneni Mohun Bagan pur iba continental second-tier asayamung nung asayaba atema subsidy angutsü aliba kecha magitettsü.

Group stage asaya atema

Iran-i aotsü memulungba sülen Mohun Bagan pur iba asayamung nungi atsüngina liasü. Security dak sendakba nung tenangzüka ka magütsütetba aser Iran nung medical insurance coverage mali ta shia parnoki Iran-i aotsü memulungi liasü. Iba sülen team ana asaya ya null and void ta AFC-i sangdonga liasü.

Mohun Bagan-i asayaba tesem melenshitsü atema Court of Arbitration for Sport dang mepeshi saka CAS-i magizük.

Mohun Bagan nung Australia, Spain aser United Kingdom nungi asayar pongu lir. Item linüktem yagi lisopurtem dang Iran-i maotsü atema tetuyuba agütsür lir.

Kasa mapang nung parnok taoba küma October 2 nü Tractor SC den asayatsü liasü saka Iran-i maotsü telemtetba agi. Iran-i Israel amakba sülen anogo ka lir iba asaya ya asayatsü liasü.

ICC U-19 World Cup atema Pakistan squad sangdongogo

Luchii/December 18, 2025

(Agencies): Pakistan Cricket Board-i, Zimbabwe nung taruba tri-series aser ICC U19 World Cup atema asayar 15 agi kumtetba squad ka sangdongogo. Team ya Farhan Yousaf lenisüba nung asayatsü.

Afghanistan aser Zimbabwe na den tri-series ya World Cup atema renemshiba asayamung ka asütsü. Asayamung anaprongla ya 50-over format nung asayatsü.

Tri-series ya December 25 nungi January 6 tashi asayatsü aser ICC U19 World Cup ya taruba küm January 16 nungi February 6 tashi Namibia aser Zimbabwe na nung asayatsü.

Pakistan U19 team ya tang Dubai nung ACC U19 Asia Cup asayadar, kong parnok Group A nung tanabuba jenjang nung tembangba sülen Hokolbarnü Bangladesh den semifinal asayatsü. Iba asayamung final ya Deobarnü asayatsü.

Squad nung tang Asia Cup nung asaya aliba asayar ka dang

melenshir lir. Asayamung anaprongla nung left-arm spinner Mohammad Huzaifa melena Right-arm fast bowler Umar Zaib asayatsü.

Right-arm pacer Ali Raza, shibai arishi küm 15 asüba mapang 2024 küm WC nung kanga junga asayaogo pa squad nung densemogo. Pai Australia den semifinal asayaba mapang run 34 agütsür wicket 4 agi aser asaya asem nung wicket teku agia liasü.

Asayar 15 agi kumtetba squad nung Farhan Yousaf captain, Usman Khan vice-captain, Abdul Subhan, Ahmed Hussain, Ali Hasan Baloch, Ali Raza, Daniyal Ali Khan, Hamza Zahoor, Huzaifa Ahsan, Momin Qamar, Mohammad Sayyam, Mohammad Shayan, Niqab Shafiq, Sameer Minhas aser Umar Zaib nung densema lir.

PCB-isa, Abdul Qadir, Farhanullah, Hassan Khan, Ibtisam Azhar, aser Mohammad Huzaifa nung non-traveling reserves ama shimogo.

Carlos Alcaraz aser coach Juan Carlos Ferrero na pilaogo



Coach Juan Carlos Ferrero & Carlos Alcaraz

Luchii/December 18, 2025

(Agencies): Grand Slam trok koker aliba asayar Carlos Alcaraz aser coach Juan Carlos Ferrero na pilaogo, ta Alcaraz-i Bodhbarnü metetdaksü. Ferrero ya taoba mapang world No. 1 aser Grand Slam akokba asayar ka liasü aser pai Alcaraz ya arishi küm 16 asüba mapang nungi coach süa arur tang alima nung asayar tajungtiba ka kümdaksüogo.

Ferrero tawabangba kübok Alcaraz-i asayamung 24 kokogo, kong Grand Slams trok akokba densema lir. Pa world No. 1 jenjang nung hopta 50 liasü aser Olympics nunga silver medal ka nguogo.

Ferrero aser Samuel Lopez na nem 2025 küm atema ATP Coaches of the Year naroküm agütsüba sülen anogo ishika dang lir iba onsang ya sangdongogo. 2016 küm nungi iba award agütsü tenzüka sülen Ferrero ya iba award khen dang nungi timbaben anguba mezüngbuba coach

kümogo.

"Iba osang zülutsü ya kü atema kanga tasak lir.. küm tenet dak tema külemi inyakba sülen Juanki küna pilatsü telemtetba agiogo. Kü lanuwa pungmang asangsang kümdaksüba atema kanga pelar," ta Alcaraz-i social media ajang ashi.

"Ni tanür asüidang nungi ana külemi inyak tenzüker aser tang tashi nai ni court telung aser tema nung len aniogo. Nü den inyakba tepeyong jangradema inyakogo," ta Alcaraz-i ashi.

Ferrero-ia Instagram ajanga osang ka lemsatepba den kumtem tsüngda Alcaraz tena tangokba noksatem lemsatepa liasü. Pai, "tanü ya tejangshitsü anogo ka aser o shitak jembitsü asoshi makokba anogo ka lir," ta ashi.

Alcaraz ya Lopez küboka inyaker, shiba Alicante nung Ferrero indang academy nung inyaker. Ferrero-i kechiba iba mapang toktsü iba indang osang tejangja shingaia magütsü.

BILEMDANGANG

"Rara ajak tembangdaksütsü atema rara kecha mali."